

## Universal Declaration of Human Rights - Emiliano-Romagnolo

© 1996 – 2009 The Office of the High Commissioner for Human Rights

This HTML version prepared by the *UDHR in Unicode* project, <http://www.unicode.org/udhr>.

---

### DICHIARAZIOUN UNIVERSELA DI DIRET UMEN

#### PREAMBLI

Considerèd che u riconoscimènt dla dignità cla riguèrda tot i mémbri dla famèia umèna e di su dirèt, cumpagn e irrinunciabli, e costitués e' fundamènt dla libertà, dla giustizia e dla pèsa te mand;

Considerèd che la negazioun e el disprèz di dirèt umèn i à port ma gist d'inciviltà che i ufènd la cuscenza dl'umanità, e che la cunquèsta d'un mand duvè che al persouni al goda dla libertà at parola e at credo (foida) e dla libertà da la paura e da e' bsagn, l'è stè proclamèd cumè la piò granda aspirazioun dl'om;

Considerèd che l'è indispensabli che i dirèt umèn i sia difois da lègi, se u s vò evitè che l'om u sia custrèt a ricora, cumè utma pusibilità, m'la ribelioun countra la tirania e l'opresioun;

Considerèd che l'è nicisèrii lavurè prì u svilòp ad relazioun d'amicizia tra toti al Nazioun;

Considerèd che i popli dli Nazioun Unidi ià ribadì tu Statut la su foida ti dirèt umèn fundamentil, tla dignità e te valour dla persouna umèna, tl'uguaglienza di dirèt dl'om e dla dona, e i à decis da lavurè prì e' prugrès suciél e prì un migliour tenour ad vita t'na libertà piò granda;

Considerèd che i Stèd dli Nazioun Unidi i s'è impegné a lutè, sla colaborazioun dli Nazioun Unidi stèsi, prì u rispèt e l'oservènza universèla di dirèt umèn e dli libertà fundamentèli;

Considerèd che una concezioun unitèria at stì dirèt e at stà libertà la è fundamentèla prì la completa realizazioun at tot stì impègn;

#### L'ASSEMBLEA GENERELA

la proclama

la presènta dichiarazioun universèla di dirèt umèn cumè ideél comun da cunquistè da tot i popli e da tot al Nazioun, s'u scop che ogni individui e ogni urganismi dla società, tnénd sempra presènta stà Dichiarazioun, u s'impègna a lavurè, s'linsegnamènt e s'leducazioun, prì u rispèt at stì dirèt e at stli libertà e ad garantin, miténd in àt iniziatiivi sempri piò numerosi at caratri naziunèl e internaziunèl, l'universèl e concrèt riconoscimènt e rispèt, tent tra i popli di stés Stèd mémbri, quant tra quèi di teritòri che i è sotopost mla su giurisdizioun.

#### ARTICOLO 1 (Artècli 1)

Tot j essèri umèn i nàs lébri e cumpagn in dignità e dirèt. Lou i è dutid ad rasoun e ad cuscenza e i à da operè, ognun ti cunfrunt at ch'j ilt, sa sentimint ad fratelènza.

#### ARTICOLO 2

Ogni persouna la à da beneficié at tot i dirèt e at toti al libertà proclamid tla presènta Dichiarazioun, sènza alcuna distinzzioun prì rasoun ad raza, ad culour, ad sesso, ad lèngua, ad religioun, ad idea pulética e upinioun divèrsi, ad nazionalità o suciéla, ad richèza, ad nascita o ad qualsiasi éltà cundizioun.

Nisuna distinzzioun la sarà stabilida tnénd count du stèd pulétich, giurédich o internaziunèl de paiois o del teritorii me quale una persouna l'aapartèn, c'u sia quest indipendènt, o c'la èpa una aministrazioun fiducèria, o c'un sia autonomo, o c'u sia sugèt ma qualsiasi tip ad limitazioun ad sovranità.

#### ARTICOLO 3

Ogni individuo l'ha dirèt ma la vita, m'la libertà e m'la sicurèza dla propia persouna.

#### ARTICOLO 4

Nisuna persouna la putrà èsa tnuda in stèd ad schiavitò o ad servitò; la schiavitò e la trata di s-cév al sarà pruibidi sata qualsiasi fourma.

#### ARTICOLO 5

Nisuna persouna la putrà èsa sotoposta m'la tortura o ma un tratamènt o punizioun crudeli, disumèni o degradènti.

#### ARTICOLO 6

Ogni individuo l'ha dirèt, at tot e' mand, m'u riconoscimènt dla su personalità giurédica.

#### ARTICOLO 7

Tot i è cumpagn davènti m'la lègia e i à dirèt, senza discriminazioun, ma una uguèla protezioun da pèrta dla lègia. Tot i à dirèt ma una uguèla protezioun cunta ogni discriminazioun c'l'ha sia cuntrèria m'la presènta Dichiarazioun cumè cunta ogni incitamènt m'la discriminazioun stèsa.

#### ARTICOLO 8

Ogni persouna la à dirèt ma una concrèta pusibilità da fè recours ma tribunil competint cunta àt che i neghès i dirèt fundamentil riconosciud ma èsa stèsa dala costituzioun o da la lègia.

#### ARTICOLO 9

Nisuna persouna la putrà èsa arèstèda, tnuda in prisoun o esilièda arbitrariamènt.

#### ARTICOLO 10

Ogni persouna la à dirèt, in pusizioun ad tutèla uguagliènza, ma una giusta e publica udiènza davènti m'un tribunèl indipèndènt e imparzièl, s'u scop da determinè i su dirèt e i su duvir, e in più da determinè la fundatèza ad qualsiasi acusa penèla c'la j venga rivolta.

#### ARTICOLO 11

1. Ogni persouna acusèda d'una colpa la è presunta inocènta fina a quand la su colpevolèza lan sia stè pruvèda legalmènt t'un prucés poblich, te quale li la abia avù tot al garanzì nicisèrri prì la su difoisa.

2. Nisuna persouna la sarà cundanèda prì azioun cumèsi o prì azioun non cumèsi al quali, t'e' mumènt c'agli è stè cumèsi o non cumèsi, lin fos prevèsti cumè reéd sgand el dirèt interni o sgand el dirèt internaziunèl. Tu stès temp un putrà èsa inflèta alcuna poina più granda ad quèla prevèsta te mumènt te quale la colpa la sia stè cumèsa.

#### ARTICOLO 12

Nisuna persouna la putrà èsa sotoposta ma interferenzi arbitrèrri tla su vita privèda, tla su famèia, tla su chésa, tla su corispondènza, né ma lesioun du su unour e dla su reputazioun. Ogni persouna la à dirèt da èsa difoisa dala lègia cunta al sudèt interferinzi o lesioun.

#### ARTICOLO 13

1. Ogni persouna la à dirèt m'la libertà ad movimènt e ad residènza drointa i cunfoin ad ogni Stèd.

2. Ogni persouna la à dirèt da lasè qualsiasi paiois, cumprois e propii, e d'arturnè tu su paiois.

#### ARTICOLO 14

1. Ogni persouna la à el dirèt da ciarché e da usufruì, at ch'j ilt paìs, rifug' dal persecuzioun.
2. St'el dirèt un putrà èsa invuchéd te chés che la persouna la sia realmènt ricerchéda prì colpi non puletichi o prì azioun cuntreerii m'al finalità e m'i principi dli Nazioun Unidi.

#### ARTICOLO 15

1. Ogni persouna la à dirèt ma una citadinèzza.
2. Nisuna persouna la putrà èsa arbitrariamènt privèda dla su citadinèzza, né del dirèt ad cambié citadinèzza.

#### ARTICOLO 16

1. Umni e dòn in età giosta i à el dirèt da spusès e da fundè una famèia, senza alcuna limitazioun ad raza, citadinèzza o religioun. Lou i à i stés dirèt riguerd e' matrimonii, durent e' matrimonii e t e' mumènt du su eventuèl sciogliment.
2. E' matrimonii e putrà èsa celebrèd snà s'u lébri e tutèl cunsèns di futur spus.
3. La famèia l'è la cellula naturèla e fondamentèla dla società e la i à el dirèt da èsa difoisa dala società e da u Stèd.

#### ARTICOLO 17

1. Ogni persouna la à el dirèt da avoi una proprietà su persunèla o insèn sa éltà genta.
2. Nisuna persouna la putrà èsa privèda ingiustamènt dla su proprietà.

#### ARTICOLO 18

Ogni persouna la à dirèt m'la libertà ad pensiir, ad cuscinza, e ad religioun; st'el dirèt e cumprènd la libertà ad cambié religioun e ad cambié credo, e la libertà ad manifestè, singolarmènt o insèn sa elta génta, e sia in poblich che in privèd, la propia religioun o e' propii credo tl'insegnamènt, tli pratichi, ti gist religios e tl'oservènza di rituel.

#### ARTICOLO 19

Ogni persouna la à dirèt ma la libertà d'opinioun e d'espresion cumprois el dirèt da no èsa molestèda prì la propia upinioun e quèl da ciarché, ricéva e comuniché infurmazioun e idèi usand tot i mèzi e senza riguerd ma cunfoin.

#### ARTICOLO 20

1. Ogni persouna la à dirèt ma la libertà 'd riunioun e ad asociazioun pacéfica.
2. Nisun e pò èsa custrèt a fè pèrta d'una asociazioun.

#### ARTICOLO 21

1. Ogni persouna la à dirèt da partecipè m'e' g-vèrni de propii paiois, sia diretamènt, sia prì mèzi ad rapresentint scilt liberamènt.
2. Ogni persouna la à dirèt da èsa asunta in cundizioun ad parità t'j impiégh poblich de propii paiois.
3. La volontà populèra la è e' fundamènt dl'autorità de g-vèrni; stà volontà la à da èsa esprèsa da elezioun frequenti e leéli, organizèdi a sufrag' universèl e uguèl, a vot segrèt, opure seguend una procedura ad vutazioun altretènt lébra e garantèsta:

#### ARTICOLO 22

Ogni persouna, cumè pèrta integrènta dla società, la à dirèt mla sicurèza suciéla, nonchè mla realizazioun através u sforz naziunèl e la cooperazioun internaziunèla e in armonia sl'organizazioun e al risorsi ad ogni Stèd, di dirèt economic, suciél e culturil indispensabli m'la su

dignità e m'u lébri svilop dla su personalità.

#### ARTICOLO 23

1. Ogni persouna la à dirét m'u lavour, m'la lébra scilta dl'impiegh, ma giosti e dignitousi cundizioun ad lavour e m'la protezioun countra la disocupazioun.
2. Ogni persouna, sènza nisuna discriminazioun, la à dirét m'una uguèla retribuizioun in cunfrount m'un uguèl lavour.
3. Ogni persouna c'la lavoura la à dirét ma una pèga giosta e dignitousa c'la garantèsa ma se stèsa e m'la su famèia una vita umèna dignitousa e aiutèda, quand l'è nicisèrii, da d'j ilt mèzi ad protezioun suciéla.
4. Ogni persouna la à dirét da fundè dli organizazioun sindachéli e dèi la propia adeszioun prì la difoisa di propii interis.

#### ARTICOLO 24

Ogni persouna la à dirét m'u ripos e m'el temp lébri, tnénd count ad consequénza d'una giosta limitazioun dli ouri 'd lavour e ad ferie retribuìdi.

#### ARTICOLO 25

1. Ogni persouna la à dirét d'avoi una cundizioun ad vita c'la ai permèta da garantì la saluta e e' benèsri propii e dla su famèia, s'una atenzioun particulèra m'la'alimentazioun, m'i vistid, m'la chésa, mli medicini e m'i servizi suciél nicisèrii, e la à dirét m'la sicurèza ti chés ad disocupazioun, malatì, invalidità, vedovènza, v-ciaia e at tot i chés ch'i duvès cumpurtè la perdita di mèzi ad susisténza a cheusa ad fàt indipèndint dala su volontà.
2. La maternità e l'infanzia agl'i à dirét ma curi e asisténza particulèri. Tot i burdill, nid al'intèrni de matrimonii o fura da e' matrimonii, i à da beneficié dla stèsa protezioun suciéla.

#### ARTICOLO 26

1. Ogni persouna la à dirét ma l'istruzioun. L'istruzioun la n'à da custè gnint almeno in riferimènt mli classi elementèri e fundamentèli. L'istruzioun elementèra la à da èsa ubligatoria. L'istruzioun tecnica e prufesiunèla la à da èsa m'la purtèda ad tot e l'istruzioun superioura la à da èsa altretènt acèsébila ma tot in cunsiderazioun de mèrit ad ciascun.
2. L'istruzioun la à da èsa indirizèda m'e' pin svilop dla personalità umèna e m'u rafurzamènt du rispèt di dirét umèn e dli libertà fundamentèli. Li la à da ricerché u svilop dla comprenszioun, dla tolerènza, dl'amicizia fra toti al Nazioun, i grop ad razi diversì, i grop religios, e la à da favurì l'impègn dli Nazioun Unidi prì e' mantenimènt dla pèsa.
3. I genitur i à el dirét ad priorità tla scilta del tip d'istruzioun da dè m'i propii fiull.

#### ARTICOLO 27

1. Ogni persouna la à dirét da partecipè liberamènt m'la vita culturèla dla comunità, la à dirét da aprezè al belèzi dl'arte tli su svariédi fourmi e da contribuì m'e' prugrès dla scienza e da usufruì di su beneficc.
2. Ogni persouna la à dirét m'la protezioun d'j interis murèl e materiil proveniint da ogni produzioun scientifica, leterèria e artestica creéda da la persouna stèsa.

#### ARTICOLO 28

Ogni persouna la à dirét m'un ourdni suciél e internaziunèl te quale i dirét e al libertà proclamid tla presènta Dichiarazioun i posa èsa completamènt realizid.

#### ARTICOLO 29

1. Ogni persouna la à di duvoir ti cunfrunt dla comunità, snà drointa la quale l'è pusébli e' pin e lébri svilop dla su personalità.
2. Tl'esercizii di su dirét e dli su libertà ogni persouna la à da èsa sotoposta snà ma cli limitazioun stabilidi dala lègia prì garantì u riconoscimènt e u rispèt di dirét e dli libertà ad ch'j ilt e prì sudisfè al giosti necessità dla morale, dl'ourdni poblich e de benèsri generèl 't una società democratica.
3. Stì dirét e stlì libertà in pò, in nisun chés, èsa esercitid in cuntrast slì finalità e s'i princìpi dli Nazioun Unidi.

#### ARTICOLO 30

Nisuna pèrta dla presènta Dichiarazioun la pò èsa interpretèda tu sèns da arughés, da pèrta d'un qualsiasi Stèd o grop o persouna, un dirét da esercitè un'atività o da mèta in at un'azioun c'la épa u scop da prevariché di dirét o dli libertà proclamid tla Dichiarazioun stèsa.

---